

HITZ BITAN

FUTBOLA

Final-laurdenetako itzulikoak gaur jokatu dira UEFA txapelketan

UEFAko final-laurdenetako itzuliko partidak gaur jokatu dira: Valentzia-Inter, Feyenoord-PSV, Borussia Dortmund-Slovan Liberec eta Milan-Hapoel. Aurreneko hiru kanporaketetan berdinketa izan zen joaneko partidetan, eta gaur etxean jokatu duten taldeak dira aurrera egiteko hautagaiak. Hapoelek, aldiz, 1-0 irabazi zion Milani joanekoan, eta italiarrek lanak izango dituzte kanporaketari buelta ematen.

Lasesarre zelai berria 2003ko urtarrilerako izango da prest

Barakaldoko Lasesarre zelai berria 2003ko urtarrilerako prest izango dela jakinarazi zuen atzo Barakaldoko Hirigintza zinegotzi Diego Moyanok. Zelai berriak 7.960 pertsonarentzat izango du lekua, eta belar artifizialekoa izango da. Barakaldok Bigarren B Mailako I. multzoan jokatzeko du, eta txapelketa horretako liderra da.

BELA


Iker Martinez de Lizardui eta Xabier Fernandezek Bartzelona Hiria saria irabazi dute

Iker Martinez de Lizardui eta Xabier Fernandezek Bartzelona Hiria bela txapelketa irabazi dute 49er kategorian. Jokatuak bederatzi probetatik sei irabazi dituzte, eta, kategoria guztiak kontuan hartuta, onenari emandako saria ere Iker Martinez de Lizardui eta Xabier Fernandezek irabazi dute.

ARRAUNKETA

Euskadiko Federazioaren aurka Santurtzik jarriko helegitea onartu dute

Euskadiko Arraun Federazioak onartutako araudiaren arabera, talde batek arraunlari bat fitxatzen duenean bi urtez aritu behar du gutxienez talde horretan. Santurtzik auzitara jo zuen araudi horren aurka, eta epaileek arrazoia eman diete bizkaitarrei. Erabaki horrek zeresan handia emango du, zalantzarik gabe, eta Portugalera eta Kaikuko arraunlariei Santurtzirekin fitxa egiteko aukera emango die.

**Michael Jordanek aurreratu egingo du itzulera**

Michael Jordanek osatze bidean du eskuin belauna, eta astebururako prest izango dela uste dute Washington Wizards taldeko medikuek. Hamasei partida falta dira NBAko lehen fasea amaitzeko eta *play-off*-etara sailkatzeko Jordan itzultzea nahitaezkoa dutela uste du taldeko teknikariek. Jordani otsailaren 27an egin zioten ebakun-

tza, eta, hura gabe, nabarmen egin du behera Wizardsek. Denboraldia hasi zenetik 31 partida irabazi dituzte, eta 36 galdu. Ekialdeko konferentzian 10. dira, eta 8 sartzen dira kanporaketetan. «Falta diren partidetatik 11 irabazi behar ditugu, eta Jordan gabe ezinezkoa da hori», esan du Doug Collins-ek, Wizardsen entrenatzaileak.

MENDIA. Bi errusiar gidari dituztela, apirilean abiatuko dira Artikora

Jon Feijoo eta Guillermo Bañales iparburu geografikora iristen ahaleginduko dira


Erredakzioa | BILBO

Guillermo Bañales eta Jon Feijoo mendizaleek erronka handia bota diete euren buruei. Iparburu geografikora iristen ahaleginduko dira apirilean, Victor Voiarski eta Victor Serov errusiarrek gidari dituztela. 96 urte bete dira aurten Robert Edwin Peary munduan ezin iparralderago dagoen gunera iritsi zela. Helburua lortuz gero, Bañales eta Feijoo aurreneko euskal herritarrek izango dira balentria hori lortzen.

Apirilaren 3an abiatuko dira Bilbotik San Petesburgora (Errusia), hango Museo Artikoan hainbat eginkizun izango baitute espedizioari ekin aurretik. Moskutik Siberiako Hatan-ga hirira joko dute, eta handik Borneoko base militarra. Behin Borneora iritsita, 120 kilometro egin beharko dituzte oinez iparburura iritsi artean.

Guillermo Bañales eta Jon Feijook atzoko aurkezpenean jakinarazi zuten, 11 egunen buruan osatu nahi dute ibilbidea, eta, dena ongi bidean, apirilaren 14tik 16a bitartean iritsiko dira iparburu geografikora.

«Ibilbidea ez da zaila teknika



XOUSE SIMAL
Guillermo Bañales, Everest 2000 espedizioa aurkezpenean.

aldetik, baina klimak asko gortzen du zeharkaldia», azpimarratu zuten bi protagonistek. Izan ere, zero azpitik 30 eta 40 gradu arteko tenperaturei egin beharko diete aurre. «Hotza, hezetasuna, haizea eta hartz polarraren mehatxua izango dira zailtasun handienak», esan zuen Bañalesek. Voiarski eta

Serov izango dituzte gidari, baina GPS sistema ere erabiliko dute une oro non dauden jakiteko.

Espedizioa Euskaltelek eta Bizkaiko Foru Aldundiak babestu dute, eta azken erakunde horrek onartutako Bizkaiko Ingurumenaren Deklarazioa utzi dute iparburuan.

ERRUGBIA

Roff eta Peyrelongue hastapenetik ariko dira Ligako Kopako finalean

Koldo Alduntzin | MIARRITZE

Larunbatean jokatu du Miarritzek Ligako Kopako finala (15:00) Arroxe-laren aurka, Arroxelan, eta lapurtarrak partida prestatzen ari dira. Atzoko entrenamendua bi multzotan banatuta egin zuten jokalariek. Aitzinlariak Agileran entrenatu ziren; gibeletakoak, aldiz, Polo zalditokian. Gaur egingo dute Miarritzeko jokalariek final atariko azken saioa.

Laurent Rodriguez entrenatzaileak Roff eta Peyrelongue hastapenetik zelairatuko ditu, hila-bete pasatxo jokatu gabe egin ondoren. Gainerakoa, minutu gutxitan aritu diren jokalariek ere euren aukera izango dute; Versaillesek eta Puleotok, esatarako. Arroxela Top 16ko taldea da. Ligan multzo berean jardun dute bi taldeek, eta jokatuak bi partidak Miarritzek irabazi zituen.